

- कोटा-बूंदी मांय नुवो ग्रीनफील्ड एयरपोर्ट बणायो जावेला-केन्द्रीय मंत्रिमंडल 1 हजार 507 करोड़ रुपया रा खर्च वाळा प्रस्ताव ने मंजूरी दीनी।
- मुख्यमंत्री भजनलाल शर्मा दिल्ली मांय केई केन्द्रीय मंत्रियां सागे मीटिंग कीनी।
- राज्य रा मुख्य निर्वाचन आयुक्त कह्यो -शहरी निकायां अर पंचायतां रा चुनाव री तारीखां रो बेगो ई ऐलाण कर्यो जावेला।
- राजस्थान री मणिका विश्वकर्मा मिस यूनिवर्स इंडिया-2025 रो खिताब जीत्यो।
- 'हरियाळा राजस्थान' अभियान रा तैत 10 करोड़ पौधा रोप र प्रदेश ऐतिहासिक उपलब्धि हासिल कीनी।

000

केन्द्रीय मंत्रिमंडल कोटा-बूंदी मांय ग्रीन फील्ड हवाई अड्डो विकसित करण री मंजूरी दे दीनी है। प्रधानमंत्री नरेन्द्र मोदी री अगुवाई मांय आज व्ही केन्द्रीय मंत्रिमंडल री मीटिंग मांय ग्रीन फील्ड हवाई अड्डो बणावण रो प्रस्ताव मंजूर करी ज्यो। सूचना अर प्रसारण मंत्री अश्विनी वैष्णव आज नई दिल्ली मांय खबरनीसां ने आ जाणकारी दीनी। वे बतायो के एक हजार पांच सौ सात करोड़ रुपया रा खर्च वाळी ई परियोजना मांय बत्ती आवण-जावण री बगत एक हजार मुसाफिरां री आमद-रफ्त ऊं जुड्यो बीस हजार वर्ग मीटर हलका वाळो टर्मिनल भवन बणावणो ई शामिल है। श्री वैष्णव कह्यो के हवाई अड्डो बणावण रो काम दो साल मांय पूरो करणो तैय करी ज्यो है, ज्यीं सारु राज्य सरकार एक हजार एकड़ ऊं बत्ती जमीं मुफ्त मुहैया करावेला। श्री वैष्णव कह्यो के कोटा भणार्ई-लिखाई अर उद्योगां रो खास केन्द्र है अर ओ हवाई अड्डो बणबा ऊं क्षेत्रीय जुड़ाव, माली विकास अर सैर-सपाटा ने बधावो मिलेला।

-----

वे बतायो के मंत्रिमंडल ओडिशा मांय आठ हजार तीन सौ सात करोड़ रुपया ऊं बत्ती रकम रा खर्च वाळी छह गेलां ऊं जुड़ी राजधानी क्षेत्र नियंत्रित रिंग रोड़ बणावण री ई मंजूरी दे दीनी।

000

मुख्यमंत्री भजनलाल शर्मा आज दिल्ली मांय लोकसभा अध्यक्ष ओम बिरला अर केन्द्रीय मंत्री धर्मेन्द्र प्रधान अर प्रल्हाद जोशी सागे मुलाकात कीनी। पाली रा सांसद पी.पी. चौधरी ई नई दिल्ली मांय रेलमंत्री अश्विनी वैष्णव सागे मुलाकात कीनी। वे पाली-दिल्ली बीचे सीधी रेलगाड़ी सारु करण अर हलका रा दूजा टेसनां माथे दूजी रेलगाडियां रो ठहराव करणसमेत केई मुद्दा माथे विचार कीनो। जालौर-सिरोही रा सांसद लुंबाराम चौधरी ई गृहमंत्री अमित शाह सागे मुलाकात कीनी। वे गृहमंत्री ने सुजलाम-सुफलाम नहर ने मजबूत बणा र नर्मदा नहर ऊं जोड़बा अर पाणी री घणी कमी वाळा सिरोही अर जालौर जिलां मांय पीवण अर पाणत सारु पाणी मुहैया करावण बाबत् पानड़ी संपी।

000

उपराष्ट्रपति ओहदा सारु व्हेवण वाळा चुनाव सारु बी. सुदर्शन रेड्डी इंडिया गठबंधन रा उम्मीदवार व्हेला। कांग्रेस रा अध्यक्ष मल्लिकार्जुन खड़गे आज नई दिल्ली मांय खबरनवीसां सागे बातचीत रे दौरान सुप्रीम कोर्ट रा पैली वाळा जज रेड्डी रा नाम रो ऐलाण कीनो। श्री खड़गे बतायो के गठबंधन री सगळी पार्टियां इण ने विचारधारा री लड़ाई मानता थकां उम्मीदवार उतारण र बारा मांय एकराय जतायी। श्री रेड्डी रो 21 अगस्त ने पर्वा दाखिल करण रो कार्यक्रम है।

000

चिकित्सा मंत्री गजेन्द्र सिंह खींवर जयपुर रा सवाई मानसिंह अस्पताल परिसर मांय बणाया जा रह्या आयुष्मान टावर रा कामकाज रो आज जायजो लीनो। खबरनवीसां सागे बातचीत करता थकां श्री खींवर कह्यो के वे लगातार ई परियोजना रा काम री जाणकारी ले रह्या

है। चिकित्सा मंत्री कह्यो के ई परियोजना रो काम नुवा सिरा ऊं गुणवत्ता सागे कर्यो जा रह्यो है।

000

राष्ट्रीय अनुसूचित जाति आयोग रा अध्यक्ष किशोर मकवाना अनुसूचित जाति तबका री जनता रा भला सारू राज्य सरकार री कोशिशों री सराहवणा कीनी है। श्री मकवाना आज जयपुर मांय राख्यी ज्यी समीक्षा बैठक मांय बोल रह्या हा। आयोग अनुसूचित जाति तबका री जनता रा भला सारू न्यारा-न्यारा महकमां री ओर ऊं चलायी जा रही योजनावां रा कामकाज रो जायजो लेता थकां अहलकारां ने जरूरी हुकम दीना। ई दौरान आयोग रा सदस्य वड्डेपल्ली रामचंदर अर लवकुश कुमार ई श्री मकवाना सागे मौजूद हा। मीटिंग मांय राज्य रा सामाजिक न्याय अर अधिकारिता मंत्री अविनाश गहलोत ई शामिल व्ह्या। कार्मिक विभाग रा सचिव कृष्णकांत पाठक बतायो के न्यारा-न्यारा महकमां मांय अनुसूचित जाति तबका री रीती सीटां माथे बेगी ई भर्ती री कोशिश करी जावेला।

000

प्रदेश मांय शहरी निकायां अर पंचायतां रा चुनाव री तारीखां रो बेगो ई ऐलाण कर्यो जावेला। राज्य रा मुख्य निर्वाचन आयुक्त मधुकर गुप्ता आज जयपुर मांय खबरनवीसां ने आ जाणकारी दीनी। वे कह्यो के आयोग ने मिल्या हाईकोर्ट रा हुकम पाछे दो-तीन दिन मांय ई चुनाव रा कार्यक्रम रो ऐलाण कर दियो जावेला।

000

राजस्थान री मणिका विश्वकर्मा मिस युनिवर्स इंडिया 2025 रो खिताब जीत लीनी है। जयपुर मांय व्ही ई होड़ मांय देशभर ऊं आई सुन्दरियां बीचे मुकाबलो व्ह्यो। खास तौर ऊं श्रीगंगानगर री रेहवासी मणिका दिल्ली मांय पढ़ाई सागे मॉडलिंग रो काम करे है। मणिका अब थाइलैंड मांय ई साल रा आखिर मांय व्हेवण वाळी मिस युनिवर्स होड़ मांय भारत री नुमाइन्दगी करेला। खबरनवीसां सागे बातचीत करता थकां मणिका कह्यो के आखी दुनिया ऊं आवण वाळी सुन्दरियां बीचे भारत री नुमाइन्दगी करण सारू वां मांय घणो उमाव है।

000

‘हरियालो राजस्थान’ अभियान रा तैत प्रदेश मांय ई दफ़ा हाल तांई 10 करोड़ पौधा रोप दिया ज्या है। मुख्यमंत्री भजनलाल शर्मा आ ऐतिहासिक उपलब्धि हासिल करण परां आज जयपुर मांय पोस्टर रो विमोचन कीनी। वन मंत्री संजय शर्मा आ उपलब्धि हासिल करण परां मुख्यमंत्री ऊं मुलाकात कर र वां ने बधाई दीनी अर वां ने पौधो भेंट कीनी। मुख्यमंत्री रा रेहवास माथे व्ही मुलाकात रे दौरान श्री शर्मा कह्यो के ई अभियान रा तैत पौधां री जिओ टेगिंग कर र वां री जरूरी हिफाजत अर देखभाल करी जा रही है। वे कह्यो के पांच साल मांय 50 करोड़ पौधा रोपणो तैय करी ज्यो है। मुख्यमंत्री कह्यो के आ उपलब्धि प्रदेश री जनता री पर्यावरण रा प्रति जागरूकता अर प्रतिबद्धता रो दरसाव करे है। मुख्यमंत्री जनता ऊं बत्ता ऊं बत्ता पौधा रोपण री अरज कीनी।

000

राज्य मांय ई महीना चौमासा री बिरखा कम पड़ जावण ऊं घणखर ठोड़ां गर्मी अर उमस रो असर बण्योड़ो है। केई ठोड़ां दिन री बगत पारो 35 डिग्री सेल्सियस ने पार कर ग्यो। बीकानेर मांय तापमान 40 डिग्री सेल्सियस ऊं ऊंचो चाल रह्यो है। ई बीचे राज्य रा ऊगणी अर लंकाऊ हलका मांय बरसात जद के आतूणी हलका मांय उमस अर तपिश रो दौर चाल रह्यो है। मौसम महकमो आवता दिनां उदयपुर अर जोधपुर संभाग मांय बादलां री गाज सागे बरसात व्हेवण रा आसार जताया है।

कोटा, अजमेर, जयपुर, भरतपुर अर बीकानेर संभाग मांय ई हल्की बरसात रो अनुमान है। महकमा रे मुजब ई महीना रा आखिरी सप्ताह मांय चौमासा री बिरखा मांय ओजू बधोतरी री उम्मीद है।

000

सिरोही जिला रा माउंट आबू मांय आं दिनां मोटी तादाद मांय सैलाणी पूग रह्या है। लारला पांच दिन मांय माउंट आबू पूगण वाळा सैलाणियां री तादाद एक लाख ने पार कर गयी। आकाशवाणी सागे बातचीत करता थकां सैलाणी संजय बतायो के खुशनुमा मौसम अर हरी-भरी वादियां ने निरख र वां ने घणो उमाव महसूस व्हे रह्यो है।

000

राजधानी जयपुर आखी दुनिया मांय सैर-सपाटा री सोहवणी ठोड़ रा तौर ऊं ओळखाण राखे है। अठे जूनी अर नुवी स्थापत्य कला रो संगम निजर आवे है। शहर री फाउंटैन स्क्वायर परियोजना इण ने और रूपाळो बनायो है। जयपुर शहर रा मानसरोवर हलका मांय बण्यो फाउंटैन स्क्वायर प्रोजेक्ट शहरी बुनियादी ढांचा रो आदर्श है। 16 बीघा हलका मांय फैली आ कलात्मक कृति संगीत अर रोशनी सागे लोगां ने घणी लुभावे है। इण रा बीचोंबीच बण्यो संगीतमय फव्वारो पाणी रा पर्दा माथे रोशनी सागे राजस्थानी संस्कृति री कहाणियां सुनावे है।

0000

चूरु जिला मांय राजगढ़ राजगढ़-सिद्धमुख गेला माथे आज एक पिकअप पलट जावण ऊं 27 जणा जख्मी व्हे ग्या। अ लोग लोक देवता गोगा जी रा दर्शन कर र पाछा जा रह्या हा। जख्मी लोगां ने सादुलपुर रा अस्पताल मांय भर्ती करायी ज्या है।

000

इंदिरा गाँधी राष्ट्रीय मुक्त विश्वविद्यालय-इग्नू मांय दाखिला री आखिरी तारीख 15 अगस्त ऊं बधा र 31 अगस्त, 2025 कर दीरीजी है। ई सत्र मांय नुवा प्रवेश अर ओजू रजिस्ट्रेशन सारु इग्नू रा समर्थ पोर्टल माथे नाम मण्डावणो व्हेला।

000